

**आकाशवाणी**

खबरां श्रुति खजूरिया कोला,

पैहले खास-खास खबरां:-

1. प्रधानमंत्री नरेन्द्र मोदी होरें अमरीकी राष्ट्रपति डोनाल्ड ट्रम्प- श्रीलंका दे राष्ट्रपति हुंदे कन्नै टेलीफोन पर गल्ल कीती ते पच्छम एशिया दी स्थिति ते वैश्विक ऊर्जा सुरक्षा पर चर्चा कीती।
2. प्रधानमंत्री होरें पच्छम एशिया संघर्ष दे लम्मे चिरे तगर होई सकने आहले असर कन्नै निबड़ने आस्तै 7 सशक्त समूहें दा गठन कीता ऐ।
3. सरकारै मुख्यै च ऊर्जा सुरक्षा गी मज़बूत करने आस्तै कुदरती गैस ते पेट्रोलियम उत्पादें दी पाईपलाइन बछाने दी प्रक्रिया गी सु-बवस्थित करने आस्तै नमां आदेश जारी कीता।
4. गुजरात विधानसभा नै 7 घंटें थवां मते चिरे तगर चली दी बहस मगरा समान नागरिक संहिता विधेयक पारित कीता।
5. बांगलादेश दे प्रधानमंत्री तारिक रहमान होरें नरसंहार दिवस पर शोक जाहिर कीता ते इसी सब्बने थवां शर्मनाक ते क्रूर दिनें चा इक दस्सेआ।
6. छत्तीसगढ़ च अज्जै थवां पैहले खेलो इंडिया जनजातीय खेड्डें दी शुरुआत होग।

<><><><><><>

**PM -US Prez Talks**

प्रधानमंत्री नरेन्द्र मोदी होरें गी कल अमरीकी राष्ट्रपति डोनाल्ड ट्रम्प होर टेलिफोन कीता ते पच्छम एशिया दी स्थिति पर चर्चा कीती। सोशल मीडिया दी पोस्ट च प्रधानमंत्री मोदी होरें दस्सेआ जे गल्लबात दौरान उ'नें पच्छम एशिया दी स्थिति पर गल्लबात कीती ते कन्नै गै भारत नै तनाऽ घट्ट करने ते फौरी तौर पर शांति बहाली दा समर्थन कीता। उ'नें इस गल्ला पर बी ज़ोर दिता जे होर्मुज जल डमरु मध्य दा खुला-सुरक्षित ते सौखा रौहना पूरी दुनिया लेई बड़ा जरूरी ऐ। अग्गे उ'नें आखेआ जे दौनें देशें शांति ते स्थिरता दे जत्नें आस्तै सम्पर्क च बने रौहने लेई बी सहमति जताई।

<><><><><><>

**PM -Srilanka Talks**

प्रधानमंत्री नरेन्द्र मोदी होंरें कल श्रीलंका दे राष्ट्रपति अनुरा कुमारा दिसानायके हुंदे कन्नै टेलिफोन पर गल्लबात कीती। सोशल मीडिया दी इक पोस्ट च प्रधानमंत्री मोदी होंरें दस्सेआ जे उ'नें पच्छम एशिया दी बदलदी स्थिति पर चर्चा कीती- जेदे च वैश्विक ऊर्जा सुरक्षा गी प्रभावित करने आली रुकावटें पर खास ध्यान दिता गेआ। उ'नें भारत-श्रीलंका ऊर्जा सहयोग गी मज़बूत करने ते क्षेत्रीय सुरक्षा गी बदाने दे मकसद कन्नै कीती गेदी प्रमुख पैहलें दी प्रगति दी समीक्षा कीती।

<><><><><><>

### PM- Rajya Sabha

प्रधानमंत्री नरेन्द्र मोदी होंरें पच्छम एशिया संघर्ष दे लम्मे चिरे होई सकने आहले असर कन्नै निबड़ने आस्तै 7 सशक्त समूहें दे गठन दी घोषणा कीती ऐ ते राज्यें सोयां केन्द्र सरकार कन्नै मिलियै इस संकट थवां बचने आस्तै टीम इंडिया दे तौर पर कम्म करने दी अपील कीती। युद्ध दे गंभीर असरें दा जिक्र करदे होई मोदी होंरें आखेआ जे 7 सशक्त समूह युद्ध दे नतीजें कन्नै निबड़ने ते ईंधन- ऊर्वरक- गैस आपूर्ति श्रृंखला ते मुद्रास्फीति पर रणनीतियां तयार करगंन। प्रधानमंत्री होंरें पच्छम एशिया च शांति बहाली आस्तै गल्लबात ते कूटनीति गी इक मात्र हल दस्सदे होई भारत दा रुख दोहराया। मोदी होंरें एह बी आखेआ जे भारत ईरान- इजरायल ते अमरीका सनें सारे पक्खएं दे लगातार सम्पर्क च ऐ जेदे कन्नै तनांs गी घट्ट कीता जाई सकै। कच्चे तेल- गैस ते हैल आपूर्ति सरबन्धी मामलें च भारत सामने लड़ाई करी पैदा अभूतपूर्व चुनौतियें गी स्वीकार करदे होई प्रधानमंत्री होंरें आखेआ जे भविक्ख च आत्मनिर्भरता गै इक मात्र विकल्प ऐ। उ'नें लगातार बदलदे हालात गी स्वीकार करदे होई नागरिकें थवां कुसै बी स्थिति आस्तै तयार रौहने दा आहवान कीता।

<><><><><><>

### Centre -Pipeline

सरकार नै मुख्यै च ऊर्जा सुरक्षा गी मज़बूत करने आस्तै कुदरती गैस ते पेट्रोलियम उत्पादें दी पाइपलाइन बछाने दी प्रक्रिया गी सु-बवस्थित करने आस्तै इक नमां आदेश जारी कीता ऐ। एह निर्देश होर्मुज जल डमरु मध्य दे अवरोध करी ईंधन आपूर्ति च संभावित मुश्कलें गी लेइयै बददी चिंताएं बश्कार जारी कीता गेआ ऐ। सकारी आदेश च आखेआ गेआ ऐ जे घरेलू उपभोक्ताएं तगर पाइपलाइन राएं कुदरती गैस दी आपूर्ति बदाने कन्नै उ'नें क्षेत्रें च एल.पी.जी. दी उपलब्धता बढौग- जित्थे पाइपलाइन सुविधा

नेई ऐ'ही। एह आदेश पैट्रोलियम अधिनियम 1934 तैहत परिभाषित ते केन्द्र सरकार आस्सेआ लाइसेंस हासिल सारी सार्वजनिक संस्थाएं- हाउसिंग सोसाइटी ते अधिकृत संस्थाएं पर लागू होग।



### Govt. LPG

सरकारे भरोसा दोआया ऐ जे मुख्य च पैट्रोल ते डीजल दा लोड़चदा भंडार ऐ ते एल.पी.जी दा घरेलू उत्पादन बढ़ाया गेआ ऐ ते सारे संयंत्र अपनी पूरी क्षमता कन्नै कम्म करा'रदे न। नमीं दिल्ली च पच्छिम एशिया दी हालिया गतिविधियें पर आयोजित अंतर मंत्रालयी ब्रीफिंग गी सम्बोधित करदे होई कुदरती गैस ते पैट्रोलियम मंत्रालय दी संयुक्त सचिव सुजाता शर्मा होरें नागरिकें थवां अफवाहें पर भरोसा नेई करने ते घबराहट च खरीददारी थवां बचने दा आग्रह कीता ऐ। बंदरगाह ते जहाजरानी मंत्रालय दे विशेष सचिव राजेश कुमार सिन्हा होरें दोहराया जे कुसै बी बंदरगाह पर भीड़-भाड़ नेई ऐ ते सरकार समुन्द्री बपार गी सूचारु ढंगे सिर जारी रक्खने दा पूरा जत्म करा'रदी ऐ। विदेश मंत्रालय दे अतिरिक्त सचिव असीम आर. महाजन होरें आखेआ जे सरकार खाड़ी ते पच्छिम एशिया क्षेत्र च विकसित होआ'रदी स्थिति पर लगातार नजर बनाए दे ऐ। उ'नें आखेआ जे इस क्षेत्र च रवा'रदे भारतीय समुदाय दी सुरक्षा ते कल्याण यकीनी करना साहड़ी पैहली तरजीह ऐ।



### Gujrat -UCC

गुजरात विधानसभा नै कल 7 घंटें थवां मते चिरे तगर चली दी बहस मगरा बहुमत कन्नै समान नागरिक संहिता UCC विधेयक गी पारित करी दिता ऐ। इस विधेयक च धर्म दी परवाह कीते वगैर ब्याह- तलाक- उत्तराधिकार ते लिव-इन- रिलेशनशिप गी नियंत्रित करने आस्तै इक बरोबर कन्नूनी ढांचा प्रस्तावित कीता गेआ ऐ। एदे थवां पैहले दिन गुजरात दे मुखमंत्री भूपेन्द्र पटेल होरें एह विधेयक सदन च पेश कीता- जेड़ा राज्य सरकार आस्सेआ कायम पैनल दी खीरी रिपोर्ट सौंपे जाने दे इक हफ्ते मगरा आनेआ गेआ ऐ। विधेयक दे पारित होने कन्नै गै गुजरात- उत्तराखंड मगरा UCC लागू करने आहला देशे दा दुआ राज्य बनी गेआ ऐ। उत्तराखंड नै फरवरी 2024 च सब्बनें थवां पैहले UCC विधेयक पारित कीता हा।



## Delhi CM -DITI

दिल्ली दी मुखमंत्रि रेखा गुप्ता होंरें बजट 2026-27 पेश करदे होई घोषणा कीती जे सरकार नीति आयोग दी तर्ज पर नमां थिंक टैंक जेदा नांs दिल्ली Institute Think Tank DITI होग कायम करोग- कन्नै गै शैहर गी उन्नत प्रोद्योगिकी ते उत्पादन दे केन्द्र दे तौर पर कायम करने आस्तै नमीं सैमीकंडक्टर ते ड्रोन नीतियां लेइयैँ औग। मुखमंत्रि होंरें एह बी घोषणा कीती जे बेहतर प्रशासन आस्तै 100 करोड़ रपे दी लागत कन्नै 13 मिनी सचिवालय कायम कीते जाडन- जिंदे च एकीकृत सार्वजनिक सेवा प्रदान कीतियां जाडन।



## Air India Flights

एअर इंडिया ते एअर इंडिया एक्सप्रेस अज्जै थमां पच्छिम एशिया क्षेत्र आस्तै 26 तय ते खास डोआरियें गी संचालित करोग। एअर इंडिया नै सोशल मीडिया पर पोस्ट च दस्सेआ जे दवैँ एअर लाइन्स जेद्दा आस्तै अपनी तय सेवा जारी रक्खडन ते भारत ते जेद्दाह बश्कार कुल 8 डोआरियां संचालित कीतियां जाडन। एदे इलावा एअर इंडिया एक्सप्रेस मस्कट आस्तै दिल्ली ते मुम्बई थवां औने-जाने आहली तय 4 डोआरियें दा संचालन करोग।



## Bangladesh Genocide Day

बंगलादेश दे प्रधानमंत्री तारिक रहमान होंरें अज्ज नरसंहार दिवस पर शोक जाहिर कीता ऐ। एह दिन 25 मार्च 1971 दे पीड़ितें दे चेतें च मनाया जंदा ऐ। अपनियां संवेदना जाहिर करदे होई रहमान होंरें आखेआ जे स्वतंत्रता-प्रेमी बांगलादेश दे इतिहास च 25 मार्च 1971 दे सब्बनें थवां शर्मनाक ते क्रूर दिनें चा इक ऐ। इस दिन पाकिस्तानी कब्जे आहली सेना नै ऑपरेशन सर्चलाईट दे नां पर बांगलादेशियें दा नरसंहार कीता हा। उनें आखेआ जे नरसंहार च ढाका विश्वविद्यालय-पिलरवाना ते राजा-रबाग पुलस लाइन सने बक्ख-बक्ख थाहरें पर शिक्षकें- बुद्धिजीवियें ते बे-दोसें नागरिकें पर अंधा-धुंध गोलियां चलाइयां गेइयां जेदे च बड़ी मती गिनतरी च लोकें दी मौत होई गेई।



## Parliament Today

अज्ज लोकसभा च वित्त मंत्री निर्मला सीतारमण होर वित्त बिल 2026 पर होई दी चर्चा दा जोआब देगंन। इस बिल दा मकसद माली बरा 2026-27 आस्तै केन्द्र सरकार दे माली प्रस्तावें गी लागू करना ऐ। लोकसभा च अज्ज दिवालिया ते शोधन अक्षमता संहिता (संशोधन) बिल 2025 पर बी चर्चा होग- जेहदा मकसद दिवालिया ते शोधन अक्षमता संहिता 2016 च संशोधन करना ऐ। राज्यसभा च अज्ज गृहमंत्री अमित शाह केन्द्रीय सशस्त्र पुलिस बल (सामान्य प्रशासन) बिल 2026 गी पेश करडन। एह बिल केन्द्रीय सशस्त्र पुलिस बलें च ग्रुप-ए सामान्य ड्यूटी अधिकारियें ते होरनें अधिकारियें दी भर्ती ते सेवा शर्तें गी नियंत्रित करने कन्ने सरबंधत ऐ। एहदे इलावा ट्रांसजेंडर सरबंधी कन्न 2019 गी बी अज्जै दी कार्यसूची च एहदे पर विचार ते इसी पारित करने लेई सूचीबद्ध कीता गेदा ऐ। कल लोकसभा नै इस बिल गी पारित करी दिता हा।



## KITG

छत्तीसगढ़ च अज्ज पैहले खेलो इंडिया जनजातीय खेड्डें दी शुरुआत होग। एह खेड्डां 3 अप्रैल तगर चलगंन। एहदे च एथलेटिक्स- हॉकी- फुलटबॉल- तीरंदाजी- कुश्ती ते तैराकी सनें 7 खेड्डें च प्रतियोगितां आयोजित कीती जाहगंन। केन्द्रीय युवा मामलें ते खेड्ड मंत्री डाक्टर मनसुख मांडविया होर इस कार्यक्रम दा उदघाटन करडन। इस मौके पर छत्तीसगढ़ दे मुखमंत्री विष्णु देव साईं बी मौजूद होडन। खेलो इंडिया जनजातीय खेड्ड छत्तीसगढ़ दे त्रों शैहरें रायपु- जगदलपुर ते अंबिकापुर च आयोजित कीती जाडन। रायपुर ते फुटबॉल- हॉकी- तीरंदाज- तैराकी- भार-तुलकना ते कब्डडी दी प्रतियोगितां आयोजित होगंन। बस्तर च एथलेटिक्स प्रतियोगिता दा ते सरगुजा च कुश्ती ते मल्लखंब प्रतियोगिता दा आयोजन होग।

